

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होरें आखेआ ऐ जे जम्मू कश्मीर हुन विकास-बाद्धे आली इक नमीं कहानी लिखा करदा ऐ।
- मुख्य चुनां अधिकारी होरें पैहले गेड़ दे चुनां लेई कनून नाफिज करने आली 22 एजेंसिएं दी बैठक सददी। अजेंसिएं गी आखेआ जे ओह् आपूंचै नेड़मा तालमेल बनाइयै कम्म करन ते माड़ी गतिविधिएं गी रोकने लेई तुरत कारवाई जकीनी बनान।
- जम्मू कश्मीर च औंदे असेंबली चुनाएं च मतदाताएं गी अपने पक्ख च करने लेई बक्ख-बक्ख सियासी पार्टिएं दे नेता रैलियां-जलसे करै करदे न।
- गृहमंत्री अमित शाह होरें एनआईए ते राज्यें दे आतंकवाद-रोधी दस्तें बश्कार सैहयोग बधाने दी जरूरतै पर जोर पाया ऐ।

<><><><><><>

PM JK Rally

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होरें डोडा दे खेड्ड मैदान च इक चुनावी रैली गी संबोधत कीता। इक किट्ट गी संबोधत करदे होई मोदी होरें आखेआ जे किट्टे रलियै सुरक्षत ते खुशहाल जम्मू कश्मीर बनाना ऐ। उनें आखेआ जे इस बारी आले विधानसभा चुनां केन्द्र शासत प्रदेश दे भविक्ख दा फ़ैसला करगंन। उनें लोकें गी आखेआ जे जिनें सियासी पार्टिएं पर उनें भरोसा कीता, उनें उंदे बच्चें दी अनदिक्खी कीती ते छड़ा अपने परोआर दे हितें आली भेठा दिक्खेआ। मोदी होरें आखेआ जे जम्मू कश्मीर दे युवा आतंकवाद थमां प्रभावत न ते सियासी पार्टिएं परोआरवाद गी बढ़ावा दित्ता। इनें लोकें गी गुमराह कीता। मोदी होरें आखेआ जे ओह् चांहदे न जे जम्मू कश्मीर दे हर बच्चे गी बेहतर शिक्षा होसल होए। पिछले किश ब'रें च बीजेपी सरकार नै केई स्कूल ते कालेज युवा दी बेहतरी लेई केन्द्र शासत प्रदेश च खोले न। मोदी होरें आखेआ जे डोडा च मैडिकल कालेज देने च लम्मे चिरे थमां बकाया पेदी मंग गी बी बीजेपी सरकार नै पूरा कीता ऐ।



PM-Engineer

प्रधानमंत्री नरेन्द्र मोदी होरें इंजीनियर दिवस दे मौके पर अपनियां शुभकामनां दित्तियां न। सोशल मीडियो दी इक पोस्ट च मोदी होरें मुख्य दी प्रगति, नमिएं काहडें ते चुनौतिएं कन्नै निबड़ने लेई इंजीनियरें दे योगदान दी सराहना कीती। प्रधानमंत्री होरें इंजीनियरिंग दे क्षेत्र च योगदान देने आस्तै सर एम.विश्वेश्वरैया हुंदे योगदान गी बी चेता कीता। प्रधानमंत्री होरें इस मौके पर लोकें कन्नै इक वीडियो बी सांझा कीता।



CEO-JK

जम्मू कश्मीर च असैंबली दे चुनाएं गी पूरी पारदर्शिता ते बवस्था आले ढंगै सिर करोआने लेई मुख्य चुनां अधिकारी पी.के.पोले होरें निर्वाचन भवन रेल हैड कम्पलैक्स च कनून नाफिज करने आली 22 अजेंसिएं दे ऐह्लकारें दी इक बैठक सददी। इस मौके उनेंगी अजेंसिएं बश्कार तालमेल दे महत्व बारे जानकार बनाया गोआ। मुख्य चुनां अधिकारी होरें सरबंघत ऐह्लकारें पर जोर पाया जे ओह पैहले गेड़ दे चुनां शा तकरीबन 72 घंटे पैहले मतदाताएं गी शराब, नगदी ते नशीले पद्वार्थे सनें होरनें चीजें दा लालच देइयै अपने पक्ख च करने लेई कीती जाने आली गतिविधिएं खलाफ फौरी कारवाई जकीनी बनान। पैहले गेड़ दे तैहत ओंदी 18 सितम्बर गी कश्मीर घाटी दे पुलवामा, शोपियां, कुलगाम ते अनंतनपाग जिलें सनें जम्मू खित्ते दे डोडा, किश्तवाड़ ते रामबन जिलें दे कुल 24 असैंबली हलकें च वोट पोआए जाने न। सख्त निगरानी जकीनी बनाने लेई मुख्य चुनां अधिकारी होरें अजेंसिएं पर जोर पाया जे ओह जम्मू ते श्रीनगर ब्हाई अड्डें अंदर दाखल होने ते उत्थुआं बाहर निकलने आली सब्बने थाहरें पर नेड़मी तक्क रखन। इससै चाल्ली दी निगरानी सब्बने अंतर-राज्य चैक पोस्टें ते सरहदी चैक-पोस्टें पर जकीनी बनाने दें निर्देश जारी कीते गे। भारती चुनां आयोग दे दिशा निर्देशों दी पालमा जकीनी बनाने दी जरूरतै पर जोर पांदे होई मुख्य चुनां अधिकारी होरें आबकारी मैहकमे गी आखेआ जे ओह आबकारी कनून मूजब सब्बने बंदिशें दी सख्ती नै अमलावरी जकीनी बनान।



Campaign

जम्मू कश्मीर च होने आले विधानसभा चुनाएं लेई प्रचार ते होर सरबंधी गतिविधियां तेज हुदियां जा'रदियां न। बक्ख-बक्ख सियासी पार्टिएं दे नेता रैलियां, रोड शो ते लोकें कन्नै गल्लबात करा'रदे न। तां जे मतदाताएं गी अपने पक्ख च करी सकन। पुंछ दी मेंढर थाहर इक रैली गी संबोधत करदे होई बीजेपी दे राष्ट्रीय महासचिव तरुण चुग होरें आखेआ जे दफा 370 दे हटने मगरा जम्मू कश्मीर च आम लोकें दे जीवन च बदलाव आया ऐ।

उनें आसें—मेदे ते प्रगति दा इक नमां नजरिया ते समां दिकखेआ ऐ। उनें आखेआ जे सियासी परोआरे जिनें जम्मू कश्मीर पर हकूमत कीती, उनें अलगाववाद ते आतंकवाद गी बढ़ावा दित्ता। कांग्रेस पार्टी दी प्रवक्ता सुप्रिया होरे आखेआ जे सरकार दे दावे दे बावजूद जम्मू कश्मीर च बे—रोजगारी बड़ी मती बधी ऐ। उनें आखेआ जे कांग्रेस जेकर सत्ता च आई तां ओह जम्मू कश्मीर च राज्य दा दर्जा परतियै ब्हाल करोग। कांग्रेस दे नेता ते बाहू विधानसभा क्षेत्र थमां पार्टी मेदवार तरनजीत सिंह टोनी होरे आखेआ जे जेकर ओह जित्तदे न तां ओह बाहू गी आदर्श विधानसभा हल्का बनाई देंगन। नैशनल कांफ्रेंस दे नेता ते सांसद मियां अलताफ अहमद होरे विश्वास जाहर कीता जे प्रदेश च सरकार नैशनल कांफ्रेंस ते कांग्रेस बनाग। पैहूले गेड़ तैहत् 19 सितम्बर गी होने आले विधानसभा चुनाएं तैहत् 24 हल्के पर वोट पाए जाने न। वोटें दी गिनतरी आला कम्म अगले म्हीने दी 8 तरीक गी होग।

<><><><><><>

Doordarshan

दूरदर्शन अज्ज अपनी स्थापना दी 65मीं ब'रेगंड मना करदा ऐ। मुख्यै च टेलीवीजन प्रसारण दी शुरूआत 15 सितम्बर 1959 गी होई ही जदूं उस बेल्ले दे राष्ट्रपति डॉ. राजेन्द्र प्रसाद होरे एहदे पैहूले पैहूले प्रसारण दी शुरूआत कीती ही। अज्ज दूरदर्शन दा अपना इक व्यापक नेटवर्क ऐ ते अपने बूते पर एह भारत दा सब्बने शा बड्डा लोक प्रसारक ऐ जेहदी पुज्ज हर दूर दरेड़े इलाके तोड़ी बी ऐ। दूरदर्शन दे 6 राष्ट्रीय ते 22 क्षेत्रीय चैनलें पर 24 घंटे प्रसारण होंदा ऐ। एहदे इलावा दूरदर्शन दा इक अंतर्राष्ट्रीय चैनल बी ऐ।

<><><><><><>

Amit Shah

गृहमंत्री अमित शाह होरे आखेआ जे आतंकवाद थमां बेहतर तरीके नै मकाबले लेई राष्ट्रीय जांच पड़ताल सरबंधी अजेसी एनआईए ते राज्य आतंक—रोधी दस्ते बश्कार होर मता तालमेल दी जरूरत ऐ। कल नमीं दिल्ली च राष्ट्रीय सुरक्षा कार्यनीति सम्मेलन च उनें राज्यें दे पुलस महानिदेशकें गी अपील कीती जे ओह ब'रे 2047 तोड़ी भारत गी विकसित राष्ट्र बनाने दे प्रधानमंत्री मोदी हुंदे धेइयै गी अगगे बधाने दी दिशा च कम्म करन। शाह होरे माओवाद दी मारा हेठ इलाके च थहोई दी सफलता पर संदोख बुज्जेआ ते उनें राज्यें गी सौहगा रौहने गी आखेआ, जेहड़े थेआरबंद गुट आले इलाके गी खाली कराने च हाल च कामयाब होए न। गृहमंत्री होरे आखेआ जे जम्मू कश्मीर खब्बे धड़े आला बक्खवाद ते पूर्वोत्तर सनें राष्ट्रीय सुरक्षा कन्ने जुड़े दे केई पराने मुद्दे गी सुलझाने दे मामले च मती प्रगति होई ऐ।

<><><><><><>

JCO Rajouri

थकशतवाड़ जिले दे छात्रु इलाके च 13 सितम्बर गी होए दे टाकरे च भारतीय सेना दे इक जेसीओ शहीद होई गे हे, उंदा कल राजौरी जिले च उंदे जददी ग्रां च पूरे सैन्य सम्मान कन्ने खीरी संस्कार करी दित्ता गेआ। नायब सूबेदार विपन कुमार ते सिपाही अरविंद सिंह जेहड़े हिमाचल प्रदेश दे रौहने आले हे, ओह टाकरे दरान शहीद होई गे हे। इस दरान 2 होर सैनिक घायल होए हे। एह टाकरा उसलै होआ हा जिसलै सेना ते पुलस दे सांझे दल नै जंगली इलाके च तपाशी अभियान शुरू कीता। इससै दरान आतंकवादिएं इस दल पर गोलीबारी कीती, गोलीबारी च एह दवै शहीद होई गे। विपन कुमार होर अपने पिच्छे अपने घरै आली ते 2 बच्चे छोड़ी गे न। शहीद विपन हुंदे खीरी संस्कार च ज्हारा बद्धे लोक शामिल होए। एहूदे थमां पैहले जम्मू च भारतीय वायु सेना दे स्टेशन पर श्रद्धांजलि समारोह दा सरिस्ता कीता गेआ। व्हाइट नाइट कोर दे जीओसी लैफ्टिनेंट जनरल नवीन सचदेवा होरें दौनें शहीदे गी श्रद्धांजलि भेंट कीती।

<><><><><><>

ICHR

ऐतिहासक शोध सरबंधी भारती काउंसल-आईसीएचआर नमीं दिल्ली नै जम्मू यूनिवर्सिटी दे सामरिक ते क्षेत्रीय शोध सरबंधी विभाग दे सैहयोग कन्ने जम्मू कश्मीर ते लद्दाख बारे हफते भरै दी इक प्रदर्शनी दा सरिस्ता कीता ऐ। एहूदा उद्घाटन प्रदेश दे मुख् सचिव अटल डुल्लू होरें केई गणमान्य लोकें दी मजूदगी च कीता। एह प्रदर्शनी औंदी 20 सितम्बर तगर आम लोकें लेई खुल्ली दी रौहग।

<><><><><><>

Navratri Katra

रियासी दे डिप्टी कमीशनर विशेष पाल महाजन होरें औंदी 3 अक्टूबर थमां शुरू होआ करदे नरातें लेई पवित्तर शिव खोड़ी थाहर कीती जा'रदी तैआरिएं दा इक बैठक दरान जायजा लैता। डिप्टी कमीशनर होरें नरातें दरान श्रद्धालुएं गी बेहतरिन अनुभव उपलब्ध करोआने दी जरूरतै पर जोर पाया। अधिकारिएं गी आखेआ गेआ जे ओह बिजली, पानी ते साफ सफाई जनेही अहम सेवाएं दी उपलब्धता जकीनी बनान। बैठक दरान सुरक्षा सरबंधी उपाएं बारे बी चर्चा कीती गेई ते कन्ने पुलस मैहकमे गी एह निर्देश दित्ता गेआ जे ओह संदिग्ध तत्वे पर तक्क रखने लेई कैमरें ते लाईटें दी सुददी दस्तयाबी जकीनी बनान।

<><><><><><>

Railway Board

रेलवे बोर्ड दे चेयरमैन सतीश कुमार होरें जम्मू तवी रेलवे स्टेशन पर लोको लॉबी लेई 25 जहार रुपें दे नगद ईनाम दा ऐलान कीता ऐ। एह घोषणा उनें स्टेशन दे निरीक्षण दरान कीती जित्थें रेलवे दे वरिष्ठ अधिकारी बी उंदे कन्नै हे। इस मौके सतीश कुमार होरें स्टेशन दी नमीं इमारत तगर जाने आले शिड़क ढांचे गी बेहतर बनाने दी जरूरते पर जोर पाया ते एह निर्देश दित्ता जे इस कम्मै गी तोले शा तौले सबूरा कीता जा। जम्मू रेलवे स्टेशन पर यात्रिएं दी बड़ी मती आमद गी दिक्खदे होई उनें स्टेशन पर दुए फुट ओवर ब्रिज दे तेजिया कन्नै निर्माण लेई आखेआ जे नमें ते पराने सब्बने प्लैटफार्मे कन्नै जुड़ोग। स्टेशन दे दूई श्रेणी दे प्रतीक्षा कक्ष ते शौचालयेंद ी माड़ी हालत पर चैंता जाहर करदे होई कुमार होरें हर घैंटे मगरा इनेंगी साफ करने दा हुक्म रसाल कीता। उंदे इनें निर्देशों पर तुरत कारवाई बी शुरू करी दित्ती गई ऐ।

<><><><><><><>

Neeraj Chopra

भारत दे नेज्जा सुट्टने आले खडारी नीरज चोपड़ा नै डॉयमंड लीग दा चांदी दा तगमा जित्ती लैता ऐ। कल बेल्जियम दी राजधानी ब्रसेल्स च नीरज नै 87.86 मीटर दे दिंडे पर नेज्जा सुट्टेआ ते ओ छड़े इक सेंटीमीटर दे फर्क कन्नै सुन्ने दा तगमा हासल करने शा खुंजी गे। सुन्ने दा तगमा पेरिस ओलंपिक्स च कैह दा तगमा जित्तने आले एंडरसन पीटर्स नै जित्तेआ।

<><><><><><><>